



4 November 2014
4 November 2014
P.U. (A) 289

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN PERDAGANGAN STRATEGIK (PENYAHSENARAIAAN PENGGUNA AKHIR TERLARANG) 2014

STRATEGIC TRADE (DELISTING OF PROHIBITED END-USERS) REGULATIONS 2014



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA PERDAGANGAN STRATEGIK 2010

PERATURAN-PERATURAN PERDAGANGAN STRATEGIK
(PENYAHSENARAIAN PENGGUNA AKHIR TERLARANG) 2014

PADA menjalankan kuasa yang diberikan oleh seksyen 8 dan subseksyen 55(1) Akta Perdagangan Strategik 2010 [*Akta 708*], Menteri membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Perdagangan Strategik (Penyahsenaraian Pengguna Akhir Terlarang) 2014**.

(2) Peraturan-Peraturan ini mula berkuat kuasa pada 5 November 2014.

Tafsiran

2. Dalam Peraturan-Peraturan ini—

“Jadual” ertinya Jadual Kedua kepada Perintah Perdagangan Strategik (Pengguna Akhir Terhad dan Pengguna Akhir Terlarang) 2010 [*P.U. (A) 484/2010*];

“Jawatankuasa Majlis Keselamatan” ertinya jawatankuasa yang ditubuhkan menurut suatu resolusi Majlis Keselamatan Pertubuhan Bangsa-Bangsa Bersatu;

“keputusan Majlis Keselamatan Pertubuhan Bangsa-Bangsa Bersatu” ertinya keputusan Majlis Keselamatan Pertubuhan Bangsa-Bangsa Bersatu dalam resolusi yang dibuat di bawah Bab VII Piagam Pertubuhan Bangsa-Bangsa Bersatu yang ditandatangani di San Francisco pada 26 Jun 1945;

“orang yang ditetapkan” ertinya mana-mana individu atau entiti yang ditetapkan sebagai pengguna akhir terlarang di bawah seksyen 8 Akta dan disenaraikan dalam Jadual;

“pempetisyen” ertinya orang yang ditetapkan yang mengemukakan petisyen di bawah peraturan 3.

Petisyen penyahsenaraian

3. (1) Seseorang yang ditetapkan yang berada di Malaysia boleh meminta supaya namanya dinyah senarai daripada Jadual sebagai pengguna akhir terlarang dengan mengemukakan petisyen kepada Menteri.

(2) Petisyen di bawah subperaturan (1) hendaklah—

(a) dalam bentuk yang ditentukan oleh Menteri;

(b) mengandungi butiran mengenai pempetisyen dan sebab bagi penyahsenaraian; dan

(c) disokong dengan dokumen yang berkaitan sebagaimana yang difikirkan perlu oleh Menteri.

(3) Menteri boleh, pada bila-bila masa selepas menerima petisyen di bawah subperaturan (1), menghendaki pempetisyen untuk menyediakan apa-apa dokumen atau maklumat tambahan dalam tempoh yang dinyatakan oleh Menteri.

(4) Jika dokumen atau maklumat tambahan yang dikehendaki di bawah subperaturan (3) tidak disediakan oleh pempetisyen dalam tempoh yang dinyatakan atau apa-apa tempoh lanjutan yang diberikan oleh Menteri, petisyen itu hendaklah disifatkan telah ditarik balik dan hendaklah tidak boleh lagi diteruskan, tanpa menjejaskan petisyen baru yang dikemukakan oleh pempetisyen.

(5) Menteri hendaklah, setelah menimbangkan petisyen di bawah subperaturan (1) dan apa-apa dokumen atau maklumat tambahan di bawah subperaturan (3), jika ada, memutuskan sama ada pempetisyen tidak lagi memenuhi kriteria bagi penyenaraian dalam apa-apa sanksi yang berkaitan dengan percambahan

senjata pemusnah besar-besaran yang dikenakan menurut keputusan Majlis Keselamatan Pertubuhan Bangsa-Bangsa Bersatu.

(6) Jika Menteri memutuskan bahawa pempetisyen tidak lagi memenuhi kriteria bagi penyenaraian dalam apa-apa sanksi yang berkaitan dengan percambahan senjata pemusnah besar-besaran yang dikenakan menurut keputusan Majlis Keselamatan Pertubuhan Bangsa-Bangsa Bersatu, Menteri hendaklah mengemukakan petisyen itu kepada Jawatankuasa Majlis Keselamatan bagi keputusan Jawatankuasa Majlis Keselamatan mengikut cara yang ditentukan oleh Jawatankuasa Majlis Keselamatan.

(7) Keputusan Menteri untuk mengemukakan atau enggan untuk mengemukakan petisyen kepada Jawatankuasa Majlis Keselamatan di bawah subperaturan (6) hendaklah disampaikan kepada pempetisyen.

(8) Keengganan Menteri untuk mengemukakan petisyen kepada Jawatankuasa Majlis Keselamatan di bawah Peraturan-Peraturan ini tidak menghalang pempetisyen menggunakan apa-apa cara lain bagi maksud penyahsenaraian namanya daripada Jadual, sebagaimana yang ditentukan oleh Jawatankuasa Majlis Keselamatan.

(9) Jika Jawatankuasa Majlis Keselamatan memutuskan bahawa pempetisyen tidak lagi memenuhi kriteria bagi penyenaraian dalam apa-apa sanksi yang berkaitan dengan percambahan senjata pemusnah besar-besaran yang dikenakan menurut keputusan Majlis Keselamatan Pertubuhan Bangsa-Bangsa Bersatu, Menteri hendaklah melaksanakan keputusan Jawatankuasa Majlis Keselamatan itu dan menyah senarai pempetisyen daripada Jadual.

(10) Menteri hendaklah menyampaikan kepada pempetisyen apa-apa keputusan Jawatankuasa Majlis Keselamatan berkenaan dengan petisyen itu.